



U Rwanda Rwatangije Ubukangurambaga bwo Gukusanya no Kunagura Ibisigazwa by'Ibikoresho by'Ikoranabuhanga

Minisiteri y'Ikoranabuhanga na Inovasiyo, Minisiteri y'Ibidukikije, hamwe n'Urwego Ngenzuramikorere (RURA) bafatanyije n'abafatanyabikorwa n'ibigo bishamikiye kuri izo minisiteri, uyu munsu batangije ubukangurambaga bugamije gukangurira abaturarwanda gucunga neza no kuvugurura ibisigazwa by'ibikoresho by'ikoranabuhanga byabo.

Ubu bukangurambaga bwatwe inkunga n'Ishami ry'Umuryango w'Abibumbye ryita ku Bidukikije n'Umuryango Mpuzamahanga w'Itumanaho, burashishikariza abaturarwanda muri rusange kugarura ibikoresho by'ikoranabuhanga bishaje cyangwa bitagikora n'ibikoresha umuriro w'amashanyarazi cyangwa ingufu zikora nka wo, bizwi nk'ibisigazwa by'ibikoresho by'ikoranabuhanga, aho bizajya bijyanwa ku makusanyirizo yabigenewe abarizwa mu gihugu cyose.

Kubika nabi ibisigazwa by'ibikoresho by'ikoranabuhanga bigira ingaruka nyinshi kandi mbi ku bidukikije, ubukungu ndetse n'ubuzima bw'abantu. Mu myaka itanu ishize, Guverinoma y'u Rwanda n'abafatanyabikorwa bateye intambwe igaragara mu kubungabunga neza ibisigazwa by'ibikoresho by'ikoranabuhanga hatezwa imbere ubukungu burengera ibidukikije kandi bwisubiranywa.

Ubu bukangurambaga bushya buzongera ubumenyi ku buryo bwo gukusanya n'aho bashyira ibikoresho bishaje cyangwa bitagikora, bikoresha umuriro w'amashanyarazi cyangwa ingufu zikora nka wo ndetse no kongera ubumenyi ku bijyanye naho u Rwanda ruhagaze mu gukusanya no gucunga neza ibisigazwa by'ibikoresho by'ikoranabuhanga. Ubu bukangurambaga bugamije kongera umubare w'abagana amakusanyirizo y'ibisigazwa by'ibikoresho by'ikoranabuhanga ayoborwa na Enviroserve Rwanda, sosiyete isambura, ikanavugurura ibisigazwa by'ibikoresho by'ikoranabuhanga ku bufatanye na Guverinoma y'u Rwanda. Ibi bikazatuma harengerwa ubuzima bw'abantu n'ibidukikije.

Minisitiri w'Ikoranabuhanga na Inovasiyo, Paula Ingabire aragira ati: *"Uko ikoranabuhanga riyongera by'umwihariko ikoresheye ry'ibikoresho by'ikoranabuhanga, niko imyanda/ibisigazwa by'ibyo bikoresheye byagiye biteza ibibazo ariko nanone aho bicunzwe neza byagiye bigabanywe imyuka yangiza ikirere n'izindi ngaruka ku bidukikije. Ibarurishamibare rigaragaza ko 20% ry'imyanda ikomoka ku ikoranabuhanga ku isi ariyo yagiye icungwa neza mu buryo bwa kinyamwuga, bivuze ko isigaye yose icunzwe mu buryo bwateza ibibazo. Ubu bukangurambaga bugamije gukangurira abaturage ku ngamba zitandukanye zo gucunga imyanda ikomoka ku ikoranabuhanga hagamijwe kugabanywa ingaruka mbi iyi myanda yagira ku bidukikije ariko nanone tuyibyzamo ibindi byaduteza imbere. U Rwanda rurimo gushyiraho uburyo burambye*

bwo kugabanya imyanda ikomoka ku ikoranabuhanga kandi bufasha no mu guhanga imirimo. Tugomba kuzirikana ingaruka mbi ziyi myanda ku hazaza ari nako tubyaza amahirwe y'ubukungu n'iterambere ry'ikoranabuhanga bikadufasha kwishakira ibisubizo duhereye ku bibazo bihari."

Minisitiri w'Ibidukikije, Dr. Jeanne D'Arc Mujawamariya aragira ati: *"Mu ntego z'Icyerekezo 2050, biteganyijwe ko u Rwanda ruzaba ruri mu bihugu bifite iterambere ritabangamiye ibidukikije kandi ryihanganira imihindagurikire y'ibihe. Kugirango ibyo bigerweho, kurengera ibidukikije bigomba gushyirwa imbere. Nidushyira ibisigazwa by'ibikoresho by'ikoranabuhanga ahabugenewe, tuzagabanya umubare w'ibijyanwa mu bimoteri byakira indi myanda. Ibi bizafasha mu kubungabunga umutungo kamere, guhanga imirimo irengera ibidukikije, no kugabanya ingaruka ziterwa n'ibikoresho byangiza ubuzima bw'abanyarwanda ndetse n'ibidukikije."*

Umuyobozi Mukuru w'Agateganyo w'Urwego Ngenzuramikorere (RURA), Eng. Deo Muvunyi nawe aragira ati: *"U Rwanda rwerekanye ubushake bukomeye bwo gufata neza ibisigazwa by'ibikoresho by'ikoranabuhanga no gushyiraho amategeko agenga imicungire y'ibisigazwa by'ibikoresho by'ikoranabuhanga, ikumira ibinyabutabire byangiza ibidukikije kandi bikanagira ingaruka ku buzima bw'abantu. Twishimiye gutangiza ubu bukangurambaga hamwe n'abafatanyabikorwa bacu barimo Ishami ry'Umuryango w'Abibumbye ryita ku Bidukikije (UNEP) n'Umuryango Mpuzamahanga w'Itumanaho (ITU) kandi twizeye ko buzagenda neza ndetse bikazana impinduka zifatika mu myitwarire no mu myumvire."*

Binyuze muri ubu bukangurambaga, abaturage muri rusange bazashishikarizwa kuzana ibisigazwa by'ibikoresho by'ikoranabuhanga byabo ku makusanyirizo atandukanye kandi banabishikarize inshuti n'imiryango yabo kubigiramo uruhare. Ubukangurambaga buzakomeza kugeza mu mpera za Kamena 2022 kandi hazashishikarizwa cyane abatuye Umujyi wa Kigali n'Akarere ka Musanze (ari naho hashyizwe ikusanyirizo ry'ibisigazwa by'ibikoresho by'ikoranabuhanga bwa mbere mu Rwanda). Ubu bukangurambaga buje mu rwego rwo kwibutsa ko buri wese akeneye gufata ingamba zo kurinda isi dutuyeho no kugira uruhare mu iterambere rirambye kandi rirengera ibidukikije ry'igihugu.

Abafatanyabikorwa

Ubu bukangurambaga bwo kongera ubumenyi ku bisigazwa by'ibikoresho by'ikoranabuhanga mu Rwanda bwateguwe ku bufatanye n'Ishami ry'Umuryango w'Abibumbye ryita ku Bidukikije, Umuryango Mpuzamahanga w'Itumanaho, Minisitiri y'Ikoranabuhanga na Inovasiyo, Minisitiri y'Ibidukikije, Minisitiri y'Ibikorwaremezo, Urwego Ngenzuramikorere mu Rwanda, Ikigo cy'Igihugu cyo Kubungabunga Ibidukikije, Ikigo cy'u Rwanda gishinzwe Ikoranabuhanga mu Itumanaho n'Isakazabumenyi, Ikigega cy'Igihugu cy'Ibidukikije, Global Green Growth Institute, na Enviroserve Rwanda.

Ibindi Bisobanuro

- Menya byinshi ku byerekeye Amabwiriza n° 002 yo kuwa 26/4/2018 Agenga Imicungire y'Ibisigazwa by'ibikoresho by'ikoranabuhanga mu Rwanda yatanze na RURA [hano](#).

- Kugira ngo umenye byinshi ku byerekeye kuvugurura ibisigazwa by'ibikoresho by'ikoranabuhanga mu Rwanda no gutanga gahunda yo gukusanya ibisigazwa by'ibikoresho by'ikoranabuhanga sura enviroserve.rw.
- Soma Politiki y'Igihugu yo Gucunga Ibisigazwa by'ibikoresho by'ikoranabuhanga [hano](#).

Aho Wabariza Amakuru

- Basile Uwimana, Umuyobozi ushinze Ihererekanyamakuru muri Minisiteri y'Ibidukikije kuri buwimana@environment.gov.rw cyangwa +250 788 722 870.
- Didace Ndamira, Umukozi ushinze Ihererekanyamakuru n'Abafatanyabikorwa mu Rwego Ngenzuramikorere mu Rwanda (RURA) kuri didace.ndamira@rura.rw cyangwa +250 783 702 127.